



VINNUEFTIRLIT RÍKISINS

Ákvörðun nr. 19/2018
Dags. 6. desember 2018

Álagning dagsekta á Guðmund Runólfsson hf. vegna vanrækslu á að fara eftir fyrirmælum Vinnueftirlits ríkisins

I. Málavextir

Í takmarkaðri skoðun eftirlitsmanns Vinnueftirlits ríkisins í fiskvinnslu Guðmundar Runólfssonar hf., kt. 520175-0249 að Sólvöllum 2 í Grundarfirði, þann 19. febrúar 2016, voru veitt eftirfarandi fyrirmæli í eftirlitsskýrslu B 104242:

- Að tryggja skyldi að loftþessa taki ekki loft úr kælivélarými.
- Að gera skyldi úrbætur á vélasal frystikerfis til að tryggja öryggi starfsmanna en laus veggur var á milli vélasals frystikerfis og vinnslurýmis.
- Að skerma/aðskilja skyldi ammoníakleiðslur og/eða klefa frá verkstæðisrými og tryggja að ekki gæti lekið ammoníak í rýmið.

Voru fyrirmælin gefin á grundvelli 1. og 4. mgr. 3. gr. og 1. og 2. mgr. 10. gr. reglna nr. 581/1995 um húsnæði vinnustaða, liðar 2.12. í I. viðauka við reglugerð nr. 367/2006 um notkun tækja, 10. gr. reglugerðar nr. 12/1965 um öryggisráðstafanir við frystikerfi og búnað í frystihúsum og 42. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum. Í framangreindri ákvörðun Vinnueftirlits ríkisins kom fram að fyrirtækið skyldi tilkynna Vinnueftirliti ríkisins um það þegar úrbótum væri lokið.

Fyrirmælin voru ítrekuð tvisvar sinnum með bréfum sem Vinnueftirlit ríkisins sendi Guðmundi Runólfssyni hf., dags. 3. nóvember 2016 og 21. mars 2017. Þrátt fyrir þessar ítrekanir þá var ekki farið eftir þessum fyrirmælum Vinnueftirlits ríkisins.

Með bréfi, dags. 11. október 2017, var athygli vakin á rétti aðila skv. 13. gr. stjórnslulaga nr. 37/1993 að tjá sig um efni máls áður en ákvörðun yrði tekin í því. Kom fram í bréfinu að

Vinnueftirlit ríkisins væri að íhuga að leggja dagsektir á Guðmund Runólfsson hf. þar sem það hafði ekki farið að ofangreindum fyrirmælum stofnunarinnar. Guðmundi Runólfssyni hf. var veitt 14 daga frestur til að koma að andmælum áður en Vinnueftirlit ríkisins tæki ákvörðun um hvort leggja skyldi á fyrirtækið dagsektir, sbr. heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum. Með tölvupósti, dags. 23. október 2017, sendi fyrirtækið beiðni um aukinn frest og með tölvubréfi sama dag veitti Vinnueftirlit ríkisins aukinn frest til 1. desember 2018. Í framangreindu bréfi Vinnueftirlits ríkisins kom skýrlega fram að ef tilkynning um úrbætur vegna framangreindra fyrirmæla, sbr. 10. mgr. 82. gr. laga nr. 46/1980, bærst ekki stofnuninni til og með 1. desember 2018 þá kæmi til álagningar dagsektar án frekari fyrirvara. Ekkert heyrðist frekar frá Guðmundi Runólfssyni hf. eftir það.

II. Niðurstaða

Samkvæmt 1. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum er það tilgangur laganna að tryggja öruggt og heilsusamlegt starfsumhverfi. Samkvæmt 75. gr. laga nr. 46/1980 er það hlutverk Vinnueftirlits ríkisins að hafa eftirlit með lögunum. Í lögum um aðbúnað, hollustuhætti og öryggi á vinnustöðum eru mörg almenn efnisákvæði er kveða á um hvernig vinnuumhverfi starfsmanna skuli háttað og í reglum og reglugerðum sem settar hafa verið á grundvelli þeirra eru ákvæði laganna nánar útfærð.

Samkvæmt 13. gr. laga nr. 46/1980 er það skylda atvinnurekanda að tryggja að gætt sé fyllsta öryggis og góðs aðbúnaðar og hollustuhátta á vinnustað. Skv. 37. gr., 42. gr. og 46. gr. laga nr. 46/1980 skal fylgja fyrirmælum Vinnueftirlits ríkisins að því er varðar aðbúnað, hollustuhætti og öryggi á vinnustöðum. Ákvæði 10. mgr. 82. gr. laga nr. 46/1980 kveður á um það að ef Vinnueftirlit ríkisins beinir skriflegum fyrirmælum til atvinnurekanda um úrbætur á vinnustað ber viðkomandi atvinnurekanda eða fulltrúa hans að tilkynna stofnuninni formlega, svo sem bréflega eða með rafrænum hætti, þegar umræddum úrbótum er lokið á vinnustaðnum. Þar sem Guðmundur Runólfsson hf. hefur ekki farið að framangreindum fyrirmælum Vinnueftirlits ríkisins þrátt fyrir að fyrirmælin hafi verið ítrekuð og veittir hafa verið margir frestir þá hefur stofnunin tekið þá ákvörðun að leggja á Guðmund Runólfsson hf. dagsektir, sbr. heimild í 87. gr. laga nr. 46/1980, þangað til fyrirtækið uppfyllir lagaskyldur sínar, en sú grein kveður á um það, að ef ákvæði laga nr. 46/1980 eða reglna sem settar eru með stoð í þeim eru brotin og ekki er farið eftir ákvörðun Vinnueftirlits ríkisins á grundvelli þeirra þá getur stofnunin ákveðið að sá eða þeir sem ákvörðun beinist að greiði dagsektir þar til farið verður að henni.

Samkvæmt gögnum Vinnueftirlits ríkisins þá starfa 81 starfsmenn hjá Guðmundi Runólfssyni hf.

III. Ákvörðunarorð

„Guðmundi Runólfssyni hf., kt. 520175-0249, hefur brotið gegn 1. og 4. mgr. 3. gr. og 1. og 2. mgr. 10. gr. reglna nr. 581/1995 um húsnæði vinnustaða, liðar 2.12. í I. viðauka við reglugerð nr. 367/2006 um notkun tækja, 10. gr. reglugerðar nr. 12/1965 um öryggisráðstafanir við frystikerfi og búnað í frystihúsum og 42. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum.

Af þeim sökum og með heimild í 87. gr. laga nr. 46/1980 um aðbúnað, hollustuhætti og öryggi á vinnustöðum, með síðari breytingum, leggur Vinnueftirlit ríkisins dagsektir á Guðmund Runólfsson hf.. Skal Guðmundur Runólfsson hf. greiða kr. 100.000 á dag frá og með næsta degi eftir að fyrirtækinu var tilkynnt sannanlega um þennan úrskurð og þar til það hefur tilkynnt um úrbætur til Vinnueftirlits ríkisins í samræmi við ákvörðun Vinnueftirlits ríkisins 19. febrúar 2016

Vinnueftirlit ríkisins